



23.03.2022

UPA2022/25

Uunga siunnersuut: Utoqqalinersiaqarneq pillugu Inatsisartut inatsisaata allangortinneqarnissaa pillugu Inatsisartut inatsisissaattut siunnersuut, aamma siusinaartumik pensionisiat pillugit Inatsisartut inatsisaata allangortinneqarnissaanut siunnersuut

(Isumaginninnermut naalakkersuisoq)

Naalakkersuisut utoqqalinersiaqarneq pillugu aamma siusinaartumik soraarnerussutisiat pillugit inatsisartut inatsisaata allangortinneqarnissaa pillugu saqqummiussaannut Siumumit imaattumik oqaaseqassaagut.

Ukiarmi aningaasanut inatsisissamut tunngatillugu Utoqqalinersiaqarnermut aamma siusinaartumik soraarnerussutisiaqarnermut tunngatillugu naammaginngisatsinnik allanguilaarneq pivoq. Peqataanitsinnut pissutaavoq neriorsuutaamat malunnaatilimmik ukioq mannamiit inatsisartut inatsisaata allangortinneqarnerisigut utoqqalinersiaqarneq siusinaartumillu soraarnerussutisiaqarneq allangortinneqassammata.

Inatsisartut utoqqalinersiaqarneq pillugu inatsisaanni allaqqavoq utoqqalinersiaqalernerup ukiui tassaasut 67-it, kisianni... tassanngaanniit inoqutigii isertitaat aapparissalluunniit isertitai apequtaallutik ilanngartuinerput ajoraluartumik aallartittarpoq, soorluttaaq ukiortaamiit utoqqaat siusinaartumillu soraarnerussutisiallit ilarpassuisa qaffaassutaasoq maluginngitsooraat.

Siunnersuummi matumani utoqqalinersialinnut kisimiittunut aappariinnullu ukiumut 9.000,- qaffaassutaassasoq siunnersuutigineqarpoq. Imatut paasivarput aappariit utoqqalinersiaqartut ukiumut 18.000,- katillugit pissarsinerulissasut.

Utoqqalinersiaqartorli kisimiittoq 9.000,- ukiumut pissarsinerulersussaq eqqarsaatigalugu qulakkeerneqarnerisigut qularaarput ilumut pinngitsoorani ukiumut 9.000,- pissarsinerulissanersigut. Tassani eqqarsaatigaarput kisimiittut pisussaaffigalugu akiligassatigut oqimaatsorsiornerusartup pisortaniit naatsorsuutinnerup kingorna tapiissutinik, soorlu ineqarnermut assigisaanullu, pissarsisarmat. Pissarsiassaalu qaffasinnerulerpata takusinnaavarput tapiissutitut tunniunneqartartut ilanngartorneqalertussaasut taamaalilluni qaffaassutaagaluartoq iluaqutaanngitsoorluni. Qularnanngilarlu aappariinnut aamma tamanna taamatut sunniuteqartussaassaaq.

Siusinaartumik pensiuunisialinnut saniatigut sunniuteqanngitsumik isertissinnaasaat qaffanneqassasut siunnersuutigineqarpoq, tamanna ajunngilaq taamaattorli atorfigissaartumik aappaqarsimagaanni ilanngartorneqarsinnaajuaannassallutik.



Utoqqalinersiaqalersimasut siusinaartumilluunniit soraarnerussutisiaqalersimasut tassaapput ukiorpassuarni sulereersimanermi amerlasuutigut nungullarsimasut aamma tamakkiisumik sulisinnaanerat killeqalersimasoq.

Ukiorpassuarni utoqqalinersiaqartut siusinaartumilluunniit soraarnerussutisiaqartut sulilaarsinnaasarnerat aapparissalluunniit nammineerluni atorfigissaarnermigut isertitagissaalaartarnerat pillaatissiissutigiuarnera peqatigiilluta unitsinniartigu.

Nuannaarutitut tiguniartigu utoqqalinersiaqartoq siusinaartumilluunniit soraarnerussutisialik sapaatip akunneranut 10 tiiminnguarluunniit sulinermigut pissarsilaartalersinnaanera "pillaatisissutitaqanngikkaluamik".

Sulisussaqaarniarnikkut piffippassuarni amigaateqartuarnerput ilaannakunnguamilluunniit sulisitsinikkut ikorfartorsinnaavarput pisortanut inummullu namminerlut iluaqutaangaartumik. Qularnanngitsumillu atugarissaarnerq tamatta kissaatigisarput qanillattussagaluarparput.

Siumumit kissaatigisarput tassaavoq utoqqalinersiaqarnerq siusinaartumillu soraarnerussutisiaqarnerq tassaassasoq inuup nammineq periarfissarsiorsinnaaneranik killiliisuussanngitsoq tamattali pissarsiaqarfigisatsinnik aallaavilimmik iliuuseqarsinnaatitaaffiususaaq.

Naalakkersuisooqatigiit utoqqalinersiaqarnermut siusinaartumillu soraarnerussutisiaqarnermut tunngatillugu siunnersuutissaat qilanaaralugu pissangagalugulu utaqqisimavarput.

Qilanaarisarput pissangagisimasarpullu massakkut saqqummiunneqartoq takugatsigu soorunami qiimmaallaatiginerpaallugu oqaatigisinnaanngilarput. Aaqqiissutiginiagassatut saqqummiunneqartut aaqqiissutissaanngillat. Qineqqusaarnermi Qallunaat nunaani aaqqiismanertuut aaqqiisoqartariaqartumik oqaluttoqarpoq, naalakkersuisooqataasullu sukkanerpaamik malunnaatilimmik qaffaanissaq qinersisartunut oqariartuutigaat.

Siunnersuummi takusinnaasatsinni utoqqalinersialinnut siusinaartumillu soraarnerussutisialinnut nuannaajallatsitsingaartoqanngittoq takusinnaavarput. Tassa ineqarnikkut allatigullu pisariaqartitsineq malillugu tapiissutinik pisarsimagaanni kisitsisip allissutaasup tamaasa mangiaannartussaavai aammalu soorunami akileraarutaasussaallutik.

Siumumit ataatsimiititaliami suliarineqarluni aappassaaneerinninnginnermi qulaajaasoqarnissaa kissaatigaarput. Tassa allissutissatut siunnersuutigineqartup minnerpaamik utoqqalinersiaqartunut aammalu siusinaartumik soraarnerussutisiaqartunut qassit qaffaassutimininnguaq ajunngitsup tungaanut malugissaneraat.



Maanna naalackersuisuutitaqartut sulinerat soorluuna aamma oqaasiinnaasut. Taamaattumik Siumumit kissaatigaarput ataatsimiititaliami makku ilanngullugit nalilersorneqassasut, aningaasatigut matussutissaat ilanngullugit ujartuutigalugit:

- Aningaasat qaammammut tiguneqartartut inummut ataatsimut minnerpaamik 10.000-inut qaffanneqassasut.
- Utoqqalinersiat siusinaarlunilu tigusartakkat aapparisaq isertitaanut sanilliullugit ilanngaassunneqarsinnaajunnaassasut, tassami ataqqinassuseqartumik namminiussuseqartumillu inuup inuunissaa innarlerneqassanngilaq.
- Saniatigooralugu sulilluni isertitaqarneq tigusartakkanut ilanngartuineramik kinguneqartassanngitsoq, tassami soraarnerussutisiaqarluni sulii inuiaqatigiinnut sulinikkut tunniussassaqaqarumagaanni, tamanna killilersorniarneqartussaangilaq, pingaartumik tikisitanik sulisulersortilluta sulisinnaasut tamaasa atorfissaqartissimassagatsigik.
- Tigusartakkat pineqartut akileraarusersorneqassanngitsut, tassami utoqqalilluni suliuunaaraanni inuiaqatigiinnut pilersuisussaajunnaarsimaneq naqissuserneqartariaqarmat naatsorsuutigineqartariaqarlunilu.
- Ilangullugu nalilersorneqartussatut Siumumit isigaarput, pineqartunut akileraarusersuisarnermut procenti atuutsinneqartoq ataatsimiititaliami nalilersoqqinneqassasoq.

Taamatut oqaaseqarluta ataatsimiititaliami aappassanneerneqartigani apeqqutit ilanngullugit qulaajarlugillu suliarineqarnissaa innersuupparput.

Jess Svane, Siumut